

# SUGUNDU KARTA KU PAULU SKIRBI PA KORÍNTIUS

## Introduson

Dipus di skirbi 1 Koríntius, Paulu sai di Éfesu, i kamba pa Masedonia, ku sedu pruvinsia na norti di Gresia. Titu bin ciga la, ku bon nobas di jinti di Korintu (7.5-7), ma i parsi kuma i tenba jinti na Korintu ku nega otridadi di Paulu. Asin, i skirbi e karta, i da Titu pa i leba (8.6,16-17). Mas tardi Paulu bai visita elis (At 20.1-3). I la ki skirbi karta pa romanus.

## Rusumu

Kaps 1—7 Paulu ruspundi kritisismu di utrus na Korintu; si amor pa ki igreža  
Kaps 8—9 Oferta pa krentis koitadi na Jerusalem, ku bon nsinamentu  
aserka di da

Kaps 10—13 Paulu difindi si otridadi di apostolu

### Kumsada ku manteña

**1** <sup>1</sup>Ami Paulu, apostolu di Kristu Jesus pa vontadi di Deus, ku no ermon Timótiu, no na skirbi pa igreža di Deus ku sta na Korintu, ku tudu pobu di Deus ku sta na tudu Akaia. <sup>2</sup>N misti pa Deus no Pape ku Siñor Jesus Kristu da bos fabur ku pas.

### Paulu fala Deus obrigadu

<sup>3</sup>No ngaba Deus, Pape di no Siñor Jesus Kristu, Pape ku ta ten pena di nos, Deus ku tudu koražen bin del, <sup>4</sup>ku ta animanu na tudu kasabi, pa no pudi tambi anima utrus na tudu koldadi kasabi. No ta da utrus ki koražen ku anos propi no risibi di Deus. <sup>5</sup>Suma ku sufrimentu di Kristu ciu, anos no toma parti nel, asin tambi ku no ta risibi garandi

koražen pabia di Kristu. <sup>6</sup>Si no sufri, i pa bo sedu animadu, pa bo pudi ten salbason. Si no animadu, abos tambi bo animadu, bo ta dadu forsa pa nguenta ku pasensa mesmu sufrimentu ku anos tambi no nguenta. <sup>7</sup>No speransa pa bos i firmi. No sibi kuma, suma ku bo toma parti na kasabi, bo na risibi tambi koražen.

<sup>8</sup>Ermons, N misti pa bo sibi kansera ku bin riba di nos na pruvinsia di Asia. Kargu ku bin riba di nos i pisadu dimas pa no nguental, tok no pirdi speransa di vida. <sup>9</sup>No pudi sintiba dentru di nos kuma no sta kondenadu pa mortu, ma e kusa kontisi pa ka no fiansa na no kabesa, ma na Deus ku ta lantanda mortus. <sup>10</sup>El i libranu di ki garandi pirigu di mortu; i na torna libranu mas. No pui no speransa nel kuma i na libranu sempri, <sup>11</sup>si bo kontinua judanu na bo orason. Asin suma ku manga di bos na ora pa nos, Deus

**1.2:** Rom 1.7   **1.3:** Ef 1.3; 1 Ped 1.3   **1.4:** 2 Tes 2.16  
**1.5:** Kap 4.10; Kol 1.24   **1.7:** Rom 8.17   **1.8:** At 19.9,23-41  
**1.9:** Jer 17.5,7   **1.10:** Sal 34.19; 2 Tim 3.11; 4.17-18;  
2 Ped 2.9   **1.11:** Kap 4.15; Rom 15.30; Fil 1.19; Filem 22

na mostranu si fabur; manga di jinti na gardisil pabia di nos.

### Mudansa na planu di Paulu

<sup>12</sup>Kusa ku no pudi njata nel: no konsiensia ta mostranu klaru kuma no vida na mundu, prinsipalmenti na no tratu ku bos, i sedu na puresa ku bardadi ku bin di Deus. I ka na jiresa di karni, ma i fabur di Deus. <sup>13-14</sup>No na skirbi bos son kil ku bo pudi lei, bo ntindi. Nin ku gosi bo na ntindinu son un bokadu, ma N ten speransa kuma bo na bin ntindinu mas diritu, pa bo ten tantu sabura na nos suma ku no na ten na bos na dia di Siñor Jesus.

<sup>15</sup>N tenba tantu sertesa de kusas ku N fasi kalkulu pa visita bos purmeru, pa bo risibi dus benson, <sup>16</sup>pabia, suma ku N na baiba pa Masedonia, N mistiba panti N visita bos; ora ku N na riba, pa N torna visita bos, pa bo judan na ña bias pa Judeia. <sup>17</sup>Es i kalkulu ku N fasiba. Nta N torna rabidal sin pensa? O si N na fasi ña planu, N ta fasil na ña vontadi suma jinti di mundu, pa N fala “Sin sin” ku “Nau Nau” na mesmu tempu? <sup>18</sup>Suma ku Deus i fiel, kil ku no ta fala bos i ka Sin ku Nau jagasidu. <sup>19</sup>Fiju di Deus, Jesus Kristu, ku ami ku Timótiu ku Silvanu no konta bos del, i ka jagasi Sin ku Nau, ma el i son Sin. <sup>20</sup>Suma ku tudu purmesa di Deus, i Jesus ku sedu ki SIN ku sta riba del. E ku manda, pabia del, no ta fala Amen pa gloria di Deus. <sup>21</sup>I Deus ku konfirmanu ku bos na no ligason ku Kristu, i unjiniu. <sup>22</sup>I el tambi ku punu si marka,

i danu si Spiritu dentru di no korson suma garantia.

<sup>23</sup>N coma Deus pa ña tustumuña; el i kungsi ña korson. Pa popa bos ku manda N ka bai Korintu te gosi. <sup>24</sup>No ka misti forsa bos na bo krensa, pabia bo sta firmi na fe, ma no na tarbaja juntu ku bos pa bo pudi sta mas sabi.

**2** <sup>1</sup>Asin N rezolvi pa N ka bai mas nunde bos ku tristesa, <sup>2</sup>pabia, si N fasi bos tristi, kin ku ta dan alegria, si i ka kilis ku N fasi tristi? <sup>3</sup>E ku manda N skirbi bos ki karta. N ka mistiba bai la, pa jinti ku dibi di fasin alegri pa e fasin tristi. N fiansa kuma, si ami N sta kontenti, abos tudu bo ta sta kontenti tambi. <sup>4</sup>N skirbi bos ku korson fadigadu ku tristesa, ku manga di larma. I ka pa bo fika tristi, ma i pa bo pudi sibi kuma ku N kiri bos ciu dimas.

### Purdon pa kil ku yara

<sup>5</sup>Ki algin ku tisi e kansera, i ka ami ki pui mas tristi, ma i pui kasabi pa bos tudu, o pelu menus, pa utrus na bo metadi, pa N ka pasanta palabra. N ka misti sedu risu dimas ku el; <sup>6</sup>kastigu ku mas parti di bos dal i justal. <sup>7</sup>Gosi bo dibi di purdal, bo animal, pa ka i fika ku garandi tristesa tok i disanima dimas. <sup>8</sup>N pidi bos pa bo mostral ki garandi amor ku bo ten pa el. <sup>9</sup>N skirbi bos

---

**1.12:** Kap 2.17; 1 Kor 2.4,13 **1.13-14:** Fil 2.16;  
 1 Tes 2.19-20 **1.15:** Rom 1.11 **1.16:** 1 Kor 16.5-6  
**1.17:** Kap 10.2 **1.19:** Mar 1.1; Eb 13.8 **1.19:** At 18.5;  
 1 Tes 1.1 **1.20:** Rom 15.8; Apok 3.14 **1.22:** Kap 5.5;  
 Ef 1.13-14; 4.30; 2 Tim 2.19; Apok 7.3-4 **1.23:** Rom 1.9  
**1.24:** Rom 5.2; 1 Kor 15.1; 1 Ped 5.3 **2.1:** Kap 12.20-21  
**2.4:** Kap 7.8-9,12 **2.5:** 1 Kor 5.1 **2.6:** 1 Kor 5.4-5

pa N jubi kuma ku bo sufri e proba, si bo ta obdisin na tudu ku N fala. <sup>10</sup>Si bo purda algin kualker ofensa, ami tambi N purdal. Ora ku N purda (si kontra i ten kualker kusa pa N purda), N fasil danti di Kristu pabia di bos, pa ka Satanas bin ten forsa riba di nos, <sup>11</sup>pabia no sibi kal ki si planu mau.

<sup>12</sup>Oca ku N ciga Troas pa konta Bon Noba di Kristu, N oja kuma Siñor yabriba kamiñu pa N tarbaja la. <sup>13</sup>N staba tarpajadu dentru di mi suma ku N ka oja ña ermon Titu la. E ku manda N dispidi elis, N bai pa Masedonia.

### Tarbaju di Paulu

<sup>14</sup>No pudi fala Deus obrigadu, el ku ta lebanu suma katibu di vitoria di Kristu. I ta usanu pa no fasil kunsidu na tudu parti suma purfumu ku na spaja, <sup>15</sup>pabia no sedu suma ki ceru sabi di nsensu ku Kristu na kema pa Deus. Kilis ku na salba, tudu ku kilis ku na pirdi, e na sinti ki ceru. <sup>16</sup>Pa kilis ku na pirdi i suma un ceru fedi ku ta mata, ma pa kilis ku na salba i un purfumu di saudi ku ta da vida. Kin ki kapas pa e tarbaju li? <sup>17</sup>No ka sta suma manga di utru jinti ku ta konta palabra son ku interes di ngaña, ma danti di Deus no ta fala di Kristu na bardadi, suma ku Deus mandanu.

**3** <sup>1</sup>Nta no ten ku kumsa utru bias ngaba no kabesa? O, suma utru jinti, no pirsisa di karta di reku-mendason pa bos, o di bos? <sup>2</sup>Abos propi i no karta, skritu na no korson, ku tudu jinti pudi kungsi, e lei. <sup>3</sup>I pudi ojadu kuma abos i un karta ku Kristu skirbi, i manda pa no mon pa no ntrega. I ka skirbidu ku tinta, ma ku Spiritu di Deus bibu. I ka na tagua di pedra ma na karni di korson.

<sup>4</sup>No fala asin pa fiansa ku no ten na Deus pabia di Kristu. <sup>5</sup>I ka ten nada na nos ku ta punu pa no fala kuma no sedu kapas di fasi kualker kusa. Puder ku no ten i ta bin di Deus. <sup>6</sup>I el ku fasinu kapas di konta jinti aserka di nobu kontratu, ku ka sedu lei skritu, ma di Spiritu. Lei ku skirbidu i ta mata, ma Spiritu ta da vida.

<sup>7</sup>Lei ku gravadu letra pa letra na tagua di pedra i tisi mortu, ma gloria di Deus parsiba na ki ora ku lei dadu. Ki gloria, kontudu i staba pa pirdi, ma i pui rostu di Moisés lampra tok pobu di Israel ka pudi jubil diritu. Si lei dadu ku ki garandi gloria, <sup>8</sup>kuma ku tarbaju di Spiritu ka na ten mui mas gloria? <sup>9</sup>Si puder ku tisi kondenson tenba gloria, puder ku ta fasinu justu i ten mui mas gloria. <sup>10</sup>Pabia di gloria mas garandi di gosi, ki gloria ku na lampraba purmeru i fusku. <sup>11</sup>Si kil ku ka tarda ciu i tenba gloria, kuma ku kil ku ka na kaba ka na ten gloria mas ciu?

<sup>12</sup>No papia ku koražen pabia no ten e speransa. <sup>13</sup>No ka sta suma Moisés ku kubriba rostu ku veu, pa ka pobu di Israel ojaba manera ku gloria na disparsi nel. <sup>14</sup>Se

2.11: 1 Ped 5.8 2.12: At 16.8; 20.6 2.12: At 14.27

2.13: Kap 7.5-6 2.15: 1 Kor 1.18 2.16: 1 Ped 2.7-8

2.17: Kap 1.12; 2 Ped 2.3 3.1: Kap 5.12; At 18.27

3.2: 1 Kor 9.2 3.3: Sai 24.12 3.3: Jer 31.33; Ez 11.19;

36.26 3.5: Jon 15.5; 1 Kor 15.10; Fil 2.13 3.6: Ef 3.7;

Kol 1.25 3.6: Jer 31.31 3.6: Jon 6.63; Rom 8.2

3.7: Sai 34.1,28-30,33-35; Rom 7.10 3.9: Rom 1.17

3.14: Is 6.9-10; 25.7

ntindimentu staba ficadu, pabia, te aos, se ntindimentu sta kubridu ku ki mesmu veu ora ku libru di Beju Testamentu leidu; son Kristu ku pudi kaba ku ki veu. <sup>15</sup>Te aos, ora ku libru di Moisés leidu, ki veu ta sta riba di se ntindimentu, <sup>16</sup>ma ora ku algin konverti pa Siñor, veu ta tiradu. <sup>17</sup>Agora, Siñor ku e palabra fala del, i Spiritu. Nunde ku Spiritu di Siñor sta, liberdadi sta la. <sup>18</sup>Anos tudu ku rostu diskubertu, suma un spiju, no ta mostra gloria di Siñor. Asin Siñor, ku sedu Spiritu, i ta transformanu di un gloria pa utru mas garandi, tok no ta tene si parsensa.

### Rikesa di Spiritu na vasu di lama

**4** <sup>1</sup>Deus, na si miserikordia, i danu e tarbaju pa no fasi; asin no ka na fika disanimadu. <sup>2</sup>No nega tudu kusa di borgoña ku jinti ta fasi sukundidu. No ka ta yanda na nganu, nin no ka ta tursi palabra di Deus. No misti pa tudu jinti ku bon konsiensia pa e rapara kuma no na yanda na lus klaru di bardadi dianti di Deus. <sup>3</sup>Si Bon Noba ku no na konta sta kubridu, i son pa kilis ku na pirdi ki sta. <sup>4</sup>Deus de mundu i sega ntindimentu di kilis ku ka ta fia, pa tuji elis oja lus ku na lampra riba delis, ki lus ku bin di Bon Noba di gloria di Kristu, kil ku, na bardadi, i parsensa di Deus. <sup>5</sup>No ka ta konta aserka di no kabesa, ma di Kristu Jesus suma Siñor; anos suma bo servus pa amor di Jesus. <sup>6</sup>Deus, ku fala pa lus lampra na sukuru, i mesmu Deus ku fasi si

lus lampra na no korson, pa tisinu kuñisimentu di gloria di Deus ku na lampra na rostu di Jesus Kristu.

<sup>7</sup>Anos no tene e rikesa na vasu di lama, pa mostra kuma garandesa di puder i di Deus, i ka di nos. <sup>8</sup>Fadiga ta bin di tudu ladu, ma no ka ta fika kebradu; no ta ten duvida, ma no ka ta disispera; <sup>9</sup>no ta pirsigidu, ma no ka ta bandonadu; no ta bati-du, ma no ka ta disadu muri. <sup>10</sup>Pa tudu ladu ku no na bai no ta tisi sempri mortu di Jesus na no kurpu, pa vida di Jesus pudi ojadu tambina no kurpu. <sup>11</sup>Nkuantu no tene vida, no sta sempri ntregadu pa muri pa amor di Jesus, pa si vida tambipudi ojadu na no kurpu ku ta muri. <sup>12</sup>Asin mortu na tarbaja na nos, vida na bos.

<sup>13</sup>Skritura fala: “N fia; e ku manda N papia.” Anos tambina un mesmu spiritu di fe, no fia; e ku manda no na papia. <sup>14</sup>No sibi kuma kil ku lantanda Siñor Jesus pa vida, i na lantandanu ku el; i na lebanu si dianti juntu ku bos. <sup>15</sup>Es tudu i pa amor di bos, pa fabur di Deus, ku mas na yangasa jinti, pudi buri orason di gardisimentu pa gloria di Deus.

<sup>16</sup>E ku manda no ka ta disanima. Kontudu no kurpu pa fora i na kai puku puku, ma kil di dentru i na arnobadu kada dia. <sup>17</sup>No sufrimentu pikininu ka ta tarda, ma i ta tisinu

**3.18:** Rom 8.29; 1 Kor 13.12 **4.2:** Kap 6.7 **4.3:** Kap 3.14;

1 Kor 1.18; 2 Tes 2.10 **4.4:** Jon 12.31,40

**4.5:** 1 Kor 1.23 **4.6:** Kum 1.3; Sal 27.1; Jon 1.9; 12.46;

1 Ped 2.9; 2 Ped 1.19 **4.7:** Kap 5.1; 1 Kor 2.5

**4.8:** Kap 7.5 **4.10:** Rom 6.5,8; 8.17,36; Fil 3.10-11;

1 Ped 4.13 **4.12:** Kap 12.15; 13.9 **4.13:** Sal 116.10

**4.14:** Rom 8.11 **4.17:** Rom 8.18

un garandi gloria ku ka ta kaba, ku na pesa mas di ki sufrimentu ku no ta pasa. <sup>18</sup>No ka na jubi na kusas ku ta ojadu, ma na kilis ku ka ta ojadu, pabia kusas ku ta ojadu na pasa, ma kilis ku ka ta ojadu ka ta kaba.

### No futuru morada na seu

**5** <sup>1</sup>No sibi kuma, ora ku no tenda, ku sedu no kurpu di reia, kai, Deus ten un morada na seu pa nos, ku ka ta dana mas, kasa ku ka kumpudu ku mon di omi. <sup>2</sup>Ne no kurpu li no na jimi, ku garandi vontadi pa no bistidu ku no morada di seu. <sup>3</sup>Si no bistidu el, no ka na ojadu nun. <sup>4</sup>Nkuantu no tene e tenda di tera, no na jimi, suma ku no na kalkadu; i ka suma no misti pa no dispidu e kurpu beju, ma pa no buri bisti di ki nobu, pa kurpu ku ta muri ngulidu pa vida. <sup>5</sup>I Deus propi ku purparanu pa e mudansa; i danu si Spiritu pa i sedu no garantia.

<sup>6</sup>E ku manda no sta sempri animadu. No sibi kuma, nkuantu no mora ne kurpu li, no ka ta sta juntu ku Siñor. <sup>7</sup>No na yanda na fe, i ka na kil ku no na oja. <sup>8</sup>No ten konfiansa; no mas misti disa e kurpu ku no mora nel pa sta juntu ku Siñor. <sup>9</sup>Kusa ku no mas misti i pa no agradal, tantu na kurpu suma dipus di no muri, <sup>10</sup>pabia anos tudu no ten

ku parsi danti di tribunal di Kristu, pa kada kin risibi konformi i fasi na kurpu, ben o mal.

### Amisadi ku Deus

<sup>11</sup>Suma no sibi kuma ku Siñor di bi di rispitudu, no ta misti konvensi jinti. Deus kunsinu diritu; no na pera kuma abos tambu bo kunsinu diritu dentru di bo korson. <sup>12</sup>I ka suma no na rekumenda no kabesa utru bias pa bos, ma i pa no da bos manera di njata pabia di nos, pa bo tene rasposta pa da kilis ku na ngaba jinti son pabia di parsensa di fora, i ka di dentru. <sup>13</sup>Si no tulu, i pa Deus; si no ten juisu, i pa bos. <sup>14</sup>Amor di Kristu ta pincanu, suma ku no ntindi kuma un omi muri pa tudu jinti; asin tudu ten parti na si mortu. <sup>15</sup>I muri pa tudu, pa tudu kilis ku na vivi, pa e ka vivi mas pa se kabesa, ma pa kil ku muri pa elis, i torna vivi.

<sup>16</sup>Gosi no ka ta jubi jinti suma ku jinti di mundu ta jubi. Kontudu no ta jubiba Kristu suma ku jinti di mundu ta jubi, ma gosi no ka na jubil asin. <sup>17</sup>Si algin liga ku Kristu, i ta sedu nobu algin. Kusas beju pasa ja; tudu vida bida nobu. <sup>18</sup>I Deus ku fasi tudu e tarbaju. El, pabia di Kristu, i fasinu si amigus, i danu tarbaju di fasi utrus si amigus. <sup>19</sup>Kil ku no misti fala i di kuma, Deus staba na Kristu pa fasi tudu jinti di mundu ten pas ku el. I ka na rakada mal ke fasi. I mandanu pa no konta palabra di kuma ke pudi sedu si amigus.

<sup>20</sup>Asin, no bin suma mbaşadur di Kristu. I suma ki Deus propi ku na

**4.18:** Rom 8.24-25 **5.1:** Jon 14.2; Eb 11.10 **5.2:** Rom 8.23  
**5.3:** Apok 3.18; 16.15 **5.4:** 1 Kor 15.53-54 **5.5:** Kap 1.22  
**5.7:** 1 Kor 13.12 **5.8:** Fil 1.23 **5.10:** Mat 16.27  
**5.12:** Kap 3.1 **5.13:** Kap 11.1,16-17; 12.6,11; 1 Kor 4.10  
**5.14:** Is 53.5-6; Jon 1.29; 1 Tim 2.5-6; 1 Ped 2.24; 1 Jon 2.2  
**5.14:** Rom 6.3-11 **5.15:** Rom 6.12-13; Gal 2.20;  
 1 Kor 6.19-20 **5.16:** Rom 12.2 **5.17:** Is 65.17;  
 Jon 3.5-6; Gal 6.15; Apok 21.1,5 **5.18:** Rom 5.10  
**5.19:** Rom 3.24-25 **5.20:** Ef 6.20

roga bos ku no boka. No pidi bos, na nomi di Kristu, pa bo fasi pas ku Deus. <sup>21</sup>Kil ku ka fasi pekadu nunka, Deus fasil pa i sedu pekadu pabia di nos, pa no pudi sedu justu suma Deus, na no union ku Kristu.

**6** <sup>1</sup>Anos ku na tarbaja juntu ku Deus, no na pidi bos ku risibi ja fabur di Deus, pa ka bo tenel na nada. <sup>2</sup>Deus fala:

“Oca tempu ciga pa N mostra bos fabur,  
N obi bos.

Na dia di salbason N sakura bos.”  
Agora, dia di fabur ciga ja. Aos i dia pa sedu salbu.

<sup>3</sup>No ka misti pa ningin oja falta na no tarbaju. Asin, no ta libra di pui mbaransu na kamiñu di algin. <sup>4</sup>Na tudu ku no ta pasa, no ta mostra kuma no sedu servus di Deus, manera ku no ta sufri ku pasensa na fadiga, na falta, na kasabi. <sup>5</sup>No sutadu, no prindidu; jinti junta na nos; no tarbaja ciu, utru ora ku fomi, ku falta di sonu. <sup>6</sup>No mostra pabia di no vida limpu, no ntindimentu, no pasensa, no bondadi, pabia di Spiritu Santu, ku no amor di bardadi, <sup>7</sup>ku puder di Deus, ku no manera di konta palabra di bardadi; es tudu i ta mostra kuma no sedu servus di Deus. No tene no vida justu suma no arma pa ataka, tambi pa difindi. <sup>8</sup>Rispitu ku disrispitu, ngaba ku fala mal, tudu no ta pudu. No sedu nganaduris ku ta fala bardadi! <sup>9</sup>No sedu jinti diskuñisidu ku tudu jinti kungsi; i suma no muri ma inda no bibu; no kastigadu ma no ka matadu; <sup>10</sup>no fasidu tristi, ma sempri

kontenti; no parsi pobri ma no ta fasi manga di jinti riku; no parsi suma ku no ka tene nada, ma na bardadi no tene tudu.

<sup>11</sup>Ermons di Korintu, no fala bos klaru; no yabri no korson tudu pa bos. <sup>12</sup>I ka anos ku fica korson pa bos, ma i abos ku fica bo korson pa nos. <sup>13</sup>N na papia ku bos suma ku pape ta papia ku si fiju. Bo yabri bo korson diritu pa nos, suma no yabri di nos pa bos.

### **Avisu kontra pekadu di junta ku mundu**

<sup>14</sup>Ka bo liga ku kilis ki ka krenti; e ka pudi fila ku bos. Kuma ku ben ku mal pudi junta? Kuma ku lus ku sukuran pudi sta juntu? <sup>15</sup>Kuma ku Kristu ku Belial pudi fila? O kuma ku krenti pudi junta mon ku kil ki ka krenti? <sup>16</sup>Kal kontratu ku kasa di Deus pudi ten ku idulu? I anos gora ku sedu kasa di Deus bibu. El propi i fala:

“N na mora juntu ku elis,  
N na yanda na se metadi.

N ta sedu se Deus;

elis e ta sedu ña pobu.” <sup>17</sup>E ku manda Siñor fala:

“Bo sai na se metadi; bo separa delis.

Ka bo toka nada impuru;  
ami N ta risibi bos,

**5.21:** Jon 8.46; Eb 4.15; 7.26; 1 Ped 2.22-24; 1 Jon 3.5

**5.21:** Is 53.5-6,9; Gal 3.13 **5.21:** Rom 1.17

**6.1:** 1 Kor 3.9 **6.2:** Is 49.8 **6.3:** Rom 14.13; 1 Kor 9.12

**6.5:** Kap 11.23-27 **6.7:** Ef 6.10-17 **6.9:** 1 Kor 4.9-10

**6.12:** Kap 12.15 **6.13:** 1 Kor 4.14 **6.14:** Lei 7.3;

1 Kor 5.9; 7.39 **6.15:** 1 Sam 5.2-4 **6.16:** 1 Kor 3.16

**6.16:** Sir 26.12; Jer 24.7; 30.22; 31.33; Zak 8.8; Apok 21.7

**6.17:** Is 52.11

<sup>18</sup> N ta sedu bo pape;  
bo ta sedu ña fijus macu ku  
femia.  
Asin ku Siñor ku ten tudu  
puder fala.”

**7** <sup>1</sup>Ermons ku N ama, suma ku no  
ten e purmesas, no limpa di tu-  
du susidadi di kurpu ku spiritu, pa  
no kompleta no santidadi ku rispi-  
tu pa Deus.

### Kontentamentu di Paulu

<sup>2</sup>Bo yabri bo korson pa nos. No ka  
fasi ningin mal; no ka dana vida di  
ningin, nin no ka splora ningin. <sup>3</sup>N  
ka na fala asin pa kondena bos. Su-  
ma ku N fala ja, bo sta na no korson;  
si i pa mortu o pa vida, no sta juntu.  
<sup>4</sup>N na papia abertamenti ku bos; N  
ta njata pabia di bos; na tudu no fa-  
diga N sta ku garandi koražen; N inci  
di kontentamentu tok i na darma.

<sup>5</sup>Mesmu oca no ciga Masedonia,  
no ka tenba diskansu na kurpu. No  
kansa na tudu ladu — geras pa fo-  
ra, medu dentru di no korson, <sup>6</sup>ma  
Deus, ku ta da koražen pa kilis ku  
sta disanimadu, i danu koražen oca  
Titu bin. <sup>7</sup>I ka son suma i bin, ma  
tambi manera ki danu pasada di  
kuma bo dal koražen. I konta kuma  
ku bo tene saudadi di mi, bo sta tris-  
ti, bo sta pruntu pa toma parti pa  
mi. Asin N fika inda mas kontenti.

<sup>8</sup>Nin ku ki karta ku N skirbi bos  
fasi bos tristi, N ka ripindi di skirbil.  
N mistiba ripindi oca ku N oja kuma

**6.18:** Jer 31.9 **7.1:** 1 Ped 1.22; 1 Jon 3.3 **7.2:** Kap 12.16;  
At 20.33 **7.3:** Kap 6.11-12; 11.11 **7.5:** Kap 4.8  
**7.6:** Kap 1.4; 2.13 **7.8:** Kap 2.4 **7.10:** Jer 31.18-20;  
Zak 12.10; Mat 26.75; 27.4-5 **7.13:** Rom 15.32; Filem 7  
**7.15:** Kap 2.9; Fil 2.12 **7.16:** Gal 5.10; 2 Tes 3.4; Filem 21

ki karta fasi bos tristi un bokadu,  
<sup>9</sup>ma gosi N kontenti; i ka pabia bo  
fasidu tristi, ma pabia bo tristesa i  
tisi mudansa di korson. Deus usa ki  
tristesa; asin kil ku no fasi i ka fasi  
bos mal. <sup>10</sup>Tristesa ku bin di Deus i  
ta tisi mudansa di korson ku ta da  
salbason, ku ningin ka ta fika ripin-  
didu del, ma tristesa di mundu ta  
tisi mortu. <sup>11</sup>Bo jubi kuma ku Deus  
usa e bo tristesa, pa bo toma kusa  
ku seredadi, pa difindi bo kabesa,  
bo sinti raiba, ku medu, ku saudadi,  
ku interes garandi; bo staba pruntu  
pa kastiga ki mal; na tudu bo mos-  
tra sin kulpa ne asuntu.

<sup>12</sup>Ke ku manda N skirbi ki karta, i ka  
pabia di kil ku fasi mal, nin kil ku su-  
fri mal, ma pa pudi mostra bos, diani  
di Deus, bo garandi interes pa nos. <sup>13</sup>E  
ku manda no staba animadu asin. No  
ka staba son animadu, ma alegria di  
Titu fasinu mas kontenti, manera ku  
abos tudu bo juda dal animu. <sup>14</sup>N ka  
fika ku borgoña pabia di kualker kusa  
bon ku N fala di bos. Kada palabra ku  
no ta falaba bos i sedu bardadi. Asin  
tambi, manera ku no ngaba bos diani  
di Titu, i proba kuma i bardadi ku no  
kontal. <sup>15</sup>Asin si amor pa bos i mas  
forti inda, manera ki ta lembra di ob-  
diensia di bos tudu, kuma ku bo risibil  
ku medu, tok bo na tirmi. <sup>16</sup>N fika ku  
garandi kontentamentu pabia na tu-  
du N ten fiansa na bos.

### Oferta pa krentis koitadi na Judeia

(Rom 15.25-29; 1 Kor 16.1-4)

**8** <sup>1</sup>Ermons, no misti konta bos di  
grasa ku Deus da na igrežas di

Masedonia, <sup>2</sup>manera ke pasa manga di proba di foronta, ma e tenba garandi alegria, tok e yabri se mon pa da ciu, kontudu elis e koitadi. <sup>3</sup>N ta konta bos kuma e da tudu kil ke pudi, inda mas di ki kil ke teneba pa da. <sup>4</sup>Di se libri vontadi e pidinu ciu pa no disa elis e ten parti na ajuda pa krentis di Jerusalen. <sup>5</sup>Se oferta i mas ba kil ku no kuda, pabia purmeru e ntrega se kurpu pa Deus, pa nos tambi, na vontadi di Deus. <sup>6</sup>Asin no pidi Titu, ku kumsa e garandi tarbaju di da, pa i bai juda bos pa kompletal. <sup>7</sup>Bo sedu riku na tudu — na fe, na palabra, na kuñisimentu, na pruntidon pa juda, na bo amor pa nos. Tambi no misti pa bo sedu bon na da.

<sup>8</sup>N ka na da ordi, ma N na konta kuma ku utrus sta pruntu pa juda, pa N jubi si bo amor i di bardadi. <sup>9</sup>Bo sibi kuma no Siñor Jesus Kristu staba pruntu pa da. El i seduba riku, ma pa amor di bos i bida pobri, pa i pudi fasi bos riku pabia di si pobresa.

<sup>10</sup>Es i ña opinion. I abos ku kumsa purmeru e tarbaju na anu pasadu. Bo mostraba garandi vontadi pa el. Agora N oja kuma i bon <sup>11</sup>pa bo kompleta kil ku bo kumsa, pa bo tene ki mesmu vontadi pa kabantal suma ku bo teneba pa kumsal. Bo da kil ku bo tene. <sup>12</sup>Si bo sta ku vontadi di da, Deus ta seta kil ku bo tene; i ka na pidi bos kil ku bo ka tene.

<sup>13</sup>N ka na buska pui kargu riba di bos pa libra utrus, <sup>14</sup>ma N misti pa bo justa. Gosi, suma bo tene ciu, bo pudi juda kilis ku ten falta. Mas danti, si

bo ten falta, si e tene ciu, e ta juda bos tambi. Asin bo ta justa tudu. <sup>15</sup>Suma ku Skritura fala: “Kil ku oja ciu i ka sobra; kil ku oja puku i ka falta.”

<sup>16</sup>No na fala Deus obrigadu manera ki pui mesmu disežu na korson di Titu suma no ten, pa juda bos. <sup>17</sup>I ka son kuma i seta no pididu, ma i staba ku garandi disežu. I na bai ku si libri vontadi pa bos. <sup>18</sup>Juntu ku el no na manda un ermon di garandi rispitu na tudu igreža, pabia di konta Bon Noba. <sup>19</sup>I ka son es, ma tambi igrežas kujil pa i sedu no kumpaņer na bias pa leba e oferta pa gloria di Siñor, pa mostra no bon vontadi pa juda.

<sup>20</sup>No misti toma sintidu na manera ku no na trata ku e manga di oferta, pa libra kritika na nos. <sup>21</sup>No ta buska fasi tudu ki retu; i ka son danti di Siñor, ma tambi danti di jinti.

<sup>22</sup>No na manda utru ermon ku elis ku manga di bias no proba; i sta sempri pruntu pa juda. Gosi i sta ku mas vontadi di juda inda, pa garandi fianza ki ten na bos. <sup>23</sup>Si bo misti sibi kusa di Titu, el i ña kumpaņer na tarbaju pa juda bos. De utru ermons ku na bai ku el, elis i delegadus di igreža, e ta tisi onra pa Kristu. <sup>24</sup>Asin bo ta mostra bo amor pa elis, pa tudu igreža pudi sibi del; e ta ntindi kuma N tenba roson di ngaba bos.

**9** <sup>1</sup>Na bardadi i ka pirsis pa N skirbi bos di oferta ku na

**8.2:** Mar 12.41-44 **8.4:** At 11.29-30; 24.17 **8.5:** Fil 4.18; Eb 13.16 **8.6:** Kap 12.18 **8.7:** 1 Kor 1.5 **8.9:** Mat 8.20; Fil 2.6-7 **8.12:** Luk 21.3 **8.15:** Sai 16.18 **8.18:** Kap 12.18 **8.21:** Dit 3.4; Rom 12.17; Fil 4.8; 1 Ped 2.12 **8.24:** Kap 7.14; 9.2 **9.1:** Kap 8.4

mandadu pa krentis di Jerusalen, <sup>2</sup>pabia N sibi kuma bo sta pruntu. E ku manda N ngaba bos diani di jinti di Masedonia; N fala elis kuma jinti di Akaia sta pruntu disna di anu pasadu. Bon vontadi di bos disperta korson di manga delis. <sup>3</sup>N na manda e ermons, pa kil ku no fala di bos aserka de oferta ka i bin sedu palabra di bentu. Asin N misti pa bo sta purparadu, suma ku N fala elis. <sup>4</sup>Si jinti di Masedonia bai ku mi, e ka oja bos purparadu, i garandi borgoña pa nos, pa fiansa ku no mostra na bos. Abos tamba bo ta burguñu. <sup>5</sup>E ku manda N oja kuma N dibi di pidi e ermons pa e bai diani pa bos, pa jubi ki oferta ku bo fala bo na da, pa i sta pruntu antis di N bai. Asin si i sta tudu pruntu, i ta mostra kuma bo da di bo vontadi, i ka a forsa.

<sup>6</sup>Lembra kuma kil ku sumia puku, i ta oja puku. Kil ku sumia ciu i ta oja tamba ciu. <sup>7</sup>Kada un ta da konformi i sinti na si korson; i ka ku tristesa, nin pa obrigason, pabia Deus ama kil ku da ku alegria. <sup>8</sup>Deus pudi darma si benson ciu riba di bos, tok bo ka ta ten falta di nada na bo vida; ki ta sobra sempri pa juda utru jinti. <sup>9</sup>Konformi i sta skritu:

“I yabri si mon ciu, i da koitadis;

si bondadi ta fika pa sempri.”

<sup>10</sup>Deus ku ta da simentera pa kil ku na sumia, ku pon pa kume, tamba i ta da bos kusa di sumia, i ta buril, tok bo bondadi i ta da manga di frutu ku na riba pa bos.

<sup>11</sup>Asin sempri Deus na da bos kil ku ciga pa bo pudi rapati ciu ku utru jinti, ku ta pui elis pa e gardisi Deus pa bo oferta ke risibi di no mon.

<sup>12</sup>E tarbaju i ka son pa juda na falta ku pobu di Deus ten, ma tamba i ta darma na manga di gardisimentu pa Deus. <sup>13</sup>E tarbaju ta proba kuma, na bardadi, bo ta obdisi Bon Noba di Kristu; i ka son setal ku boka. Pabia di kila, e ta glorifika Deus; e ta glorifikal tamba pa ki garandi oferta ku bo manda pa elis ku tudu jinti. <sup>14</sup>Elis e na ora pa bos ku garandi amor, pabia di rikesa di grasa ku Deus pui na bos.

<sup>15</sup>Deus obrigadu pa garandi kusa ki danu ku no ka pudi konta!

### Paulu na difindi si otridadi

**10** <sup>1</sup>Ami Paulu, N na roga bos, ami ku jinti fala kuma, ora ku N sta ku bos, N ta mansu, ma si N sta lunju, N ta sedu brabu pa bos. N na pidi bos, pa mansesa ku bondadi di Kristu, <sup>2</sup>ka bo obrigan, ora ku N bai la, pa N sedu brabu. N sibi sertu kuma N pudi sedu brabu ku kilis ku fala kuma no ta fasi

9.2: Kap 8.24; 2 Tes 1.4 9.2: Kap 8.10 9.6: Dit 11.24-25; 19.17; 22.9; 28.27; Mat 10.42; 19.21; Gal 6.7-10; 1 Tim 6.18; Eb 13.16 9.7: Sai 25.2; Lei 15.7; Rom 8.12 9.8: Mal 3.10; Fil 4.18-19 9.9: Sal 112.9 9.10: Is 55.10; Os 10.12 9.11: Kap 1.11; 4.15 9.12: Kap 8.14 9.13: Mat 5.16 9.14: Kap 8.1-2 9.15: Tia 1.17 10.1: Rom 12.1 10.2: 1 Kor 4.21

kusa suma jinti di mundu. <sup>3</sup>Nin ku no sta na mundu, ma no gera i ka suma di mundu. <sup>4</sup>Armas ku no ta geria ku el e ka sedu suma kilis di mundu, ma i arma ku ten puder di Deus pa kebra muras forti. <sup>5</sup>No ta pajiga pensamentu falsu, ku tudu njatamentu di orgulyu ku ta lanta kontra kuñisimentu di Deus. No ta obriga kada pensamentu pa i fika bas di Kristu. <sup>6</sup>Ora ku bo sta pruntu pa obdisi, no sta tambi pruntu pa kastiga tudu disobdiensia.

<sup>7</sup>Bo na jubi pa kusas suma ki ta parsi. Si i ten algin la ku fiansa kuma el i di Kristu, pa i pensa utru bias na si kabesa. Suma ki sedu di Kristu, asin tambi ku no sedu. <sup>8</sup>Nin ku N njata ciu pabia di otridadi ku Siñor dan pa N juda bos (i ka pa dana), N ka na burguñu. <sup>9</sup>N ka misti pa i parsi kuma N na miti bos medu ku ña kartas. <sup>10</sup>Utru jinti ta fala: “Si karta forti, i pisadu, ma ora ki sta juntu ku nos i ka ta ten nin forsa; si palabra ka ta ten balur.” <sup>11</sup>Algin ku papia asin i dibi di ntindi kuma, si N bai, ña manera ten ku sedu suma ku N skirbi na karta antis di N bai nunde bos.

<sup>12</sup>No ka osa justanda no kabesa nin komparal ku kilis ku ta yalsa se kabesa. Elis e tulu. E ta ranja se midida; e ta midi se kabesa, pa komparal ku se midida propi. <sup>13</sup>Panos, no njatamentu i ka na pasa sertu limiti. I na fika dentru di limiti di tarbaju ku Deus marka pa nos. No tarbaju na bo metadi sta dentru di ki midida. <sup>14</sup>Suma ku bo sta dentru de marka, no ka pasantal oca no

ciga nunde bos pa konta Bon Noba di Kristu. <sup>15</sup>No ka ta njata na tarbaju ku utru jinti fasi fora di lugar ku Deus markanu, ma no na pera, suma ku bo fe na kirsi, ku no pudi fasi tarbaju muitu mas garandi na bo metadi, ma sempri dentru di ki midida ku Deus markanu. <sup>16</sup>Dipus, no ta pudi leba Bon Noba pa tera mas dianti di bos, ma i ka na lugar di utru algin. Asin no ka ta njata na kil ku utru fasi ja.

<sup>17</sup>Kil ku na njata, pa i njata son na Siñor. <sup>18</sup>Kil ku Siñor pensa ben del, el ku ta setadu; i ka kil ku ta ngaba si propi kabesa.

### Apostolus finjidu

**11** <sup>1</sup>N misti pa bo ten pasensa ku mi, nin ku N sedu un bokadu tulu. Bo ten pasensa un bokadu. <sup>2</sup>N ten siumi di bos suma Deus ten propi, pabia N purpara bos pa pursenta bos suma viržen puru pa un maridu son, ki Kristu. <sup>3</sup>N ten medu pa ka bo pensamentu dana, pa bo bandona ki amor puru ku bo ten pa Kristu, suma ku serpenti ku si astusia ngana Eva, <sup>4</sup>pabia si algin bin, i konta bos aserka di utru Jesus fora di kil ku no konta aserka del, o si bo risibi utru spiritu fora di kil ku bo risibi ja, o utru Bon Noba ku ka juntu ku

**10.4:** Ef 6.13; 1 Tes 5.8; 1 Tim 1.18 **10.6:** Kap 2.9; 7.15; 13.2,10 **10.7:** Jon 7.24; 1 Kor 14.37; 1 Jon 4.6  
**10.8:** Kap 12.19 **10.10:** Kap 11.6; 1 Kor 2.3-4; Gal 4.13  
**10.15:** Rom 15.20 **10.17:** Jer 9.24 **10.18:** Dit 27.2;  
 Luk 18.11-14; Rom 2.29; 1 Kor 4.5 **11.1:** V 16; Kap 5.13  
**11.2:** Gal 4.17-18 **11.2:** Sir 21.13; Apok 19.7-9  
**11.3:** Kum 3.4; Jon 8.44; 1 Tim 4.1; Eb 13.9; 2 Ped 3.17;  
 Jud 4 **11.4:** Gal 1.7-8

kil ku bo seta ja, bo ta ngulil ku kontentamentu!

<sup>5</sup>N oja kuma ki bo garandi apostolus e ka mas mi na nada. <sup>6</sup>Nin ku N ka sedu garandi papiadur, ma N ten kuñisimentu. No proba es klaru pa bos manga di bias, na tudu manera.

<sup>7</sup>Nta es i seduba ña kulpa suma ku N ka kobra bos pa konta Bon Noba di Deus, ma N baña ña kabesa pa N pudi lantanda bos? <sup>8</sup>Na bardadi, oca ku N na tarbaja na bo metadi, i utru igreñas ku pagan. I suma N na roba elis pa juda bos! Oca ku N staba la, si N ka tene, N ka ta pidi ningin pa judan. <sup>9</sup>Ermons ku bin di Masedonia e judan na ña falta. Na tudu N libra di sedu pisadu pa bos; N na kontinua libra inda. <sup>10</sup>Es i ser-tu, suma ku bardadi di Kristu sta na mi, N na kontinua njata ne pun-tu pa tudu ladu di Akaia. Ningin ka ta tujin. <sup>11</sup>Nta N fala asin pabia N ka misti bos? Deus sibi kuma N misti bos.

<sup>12</sup>N na kontinua fasi kil ku N na fasi, pa taja kamiñu di kilis ku na buska manera di njata, pa fala kuma se tarbaju i suma di nos. <sup>13</sup>Ki koldadi jinti i apostolus finjidu, ku ta tarbaja ku nganu; e na finji kuma e sedu apostolus di Kristu. <sup>14</sup>I ka di dimira, pabia Satanas propi i ta finji kuma i sedu anju di lus. <sup>15</sup>Asin

tambi i ka garandi dimas si si servus na finji pa parsi servus di ben, ma se fin i ta sedu konformi kil ke fasi.

### Sufrimentu di Paulu

<sup>16</sup>N na ripiti utru bias: Ka ningin oja kuma N tulu, ma si algin kuda asin, bo ta risibin mesmu ku N tulu, pa N pudi njata tambi un bokadu. <sup>17</sup>Ne kusa di ngaba ña kabesa, N ka na papia suma ku Siñor misti, ma suma tulu. <sup>18</sup>Suma ku manga di utru jinti na njata na se puder, ami tambi N ta njata. <sup>19</sup>Suma abos bo jiru, bo ta nguenta tulus ku kontentamentu! <sup>20</sup>Kualker algin ku na forsija bos, ku na kume bos, ku na paña bos, ku ta yalsa ombra riba di bos, ku na bofotia bos, bo ta nguental. <sup>21</sup>N burguñu fala kuma no fraku dimas!

Na kil ku algin ten koražen di fala (N na fala suma tulu), ami tambi N ten koražen. <sup>22</sup>E sedu ebreu? Ami tambi. E sedu israelita? Ami tambi. E sedu di jorson di Abraon? Ami tambi. <sup>23</sup>E ta sirbi Kristu? N na fala suma ku N sta fora di mi, ma ami N ta sirbil mas. N mas tarbaja di ki elis; N sutadu mas di ki elis; N mas pudu prezu di ki elis; manga di bias N staba na pirigu di mortu. <sup>24</sup>Sinku bias judeus dan trinta i novi siko-tiada; <sup>25</sup>tris bias N sutadu ku po; un bias N dadu ku pedra; N foga tris bias, N pasa un noti ku un dia na mar largu. <sup>26</sup>Na manga di bias ku N fasi, N staba na pirigu di riu, pirigu di bandidus, pirigu di kilis di ña rasa ku di utru rasa, pirigu na prasa, pirigu na matu, pirigu na mar,

**11.6:** Ef 3.4 **11.7:** Kap 12.13-14; At 18.3; 20.33-35; 1 Kor 9.12 **11.8:** At 20.33 **11.9:** Fil 4.10,14-18  
**11.9:** Kap 12.14 **11.10:** 1 Kor 9.15 **11.11:** Kap 7.3  
**11.13:** Rom 16.18 **11.15:** Fil 3.19 **11.16:** Kap 5.13; 1 Kor 4.10 **11.20:** Gal 2.4 **11.22:** At 22.3; Rom 11.1; Fil 3.4-5 **11.23:** 1 Kor 15.10 **11.24:** Lei 25.3  
**11.25:** At 14.19; 16.22; 27.41 **11.26:** At 9.23; 13.50; 14.5; 17.5; 19.23; 21.30; 23.12; 28.3

pirigu na metadi di ermons finjidu. <sup>27</sup>N tarbaja ku fadiga, manga di bias sin durmi, ku fomi, ku sedi. N junjuņa manga di bias; N sufri friu ku falta di ropa.

<sup>28</sup>Fora de kusas ku N pasa na kurpu, kudadi di tudu igrežas i na pesa riba di mi kada dia. <sup>29</sup>Kin ku fraksi ku ami tambi N ka sinti fraku? Si algin pudu pa i kai, ña korson tambi ta kinti.

<sup>30</sup>Si i pirsis njata, N ta njata na kusas ku mostra ña frakesa. <sup>31</sup>Deus, Pape di no Siñor Jesus, ku ta ngabadu pa sempri, i sibi kuma N ka na konta mintida. <sup>32</sup>Ocan na Damasku, kil ku na gubernaba bas di rei Aretas i puiba guardas na porton di prasa pa prindin. <sup>33</sup>Ma N riantadu na janela di mura dentru di balai; asin N kapli di si mon.

### Vison di Paulu

**12** <sup>1</sup>I pirsis pa N njata, nin ki ka ten purbitu, ma N na pasa pa konta kusa ku Siñor mostran, i kontan. <sup>2</sup>N kungsi un omi di Kristu ku ten katorzi anu ki rabatadu pa terseru seu. Si i na kurpu o fora di kurpu N ka sibi, ma Deus sibi. <sup>3</sup>N sibi kuma ki omi (si i na kurpu o fora di kurpu N ka sibi, ma Deus sibi) <sup>4</sup>kuma i rabatadu pa Paraísu, i obi palabra sukundidu ku boka di omi ka pudi konta. <sup>5</sup>Aserka de omi N pudi njata, ma di mi propi N ka na njata; son na kusas ku ta mostra ña frakesa ku N pudi njata. <sup>6</sup>Si N mistiba njata, N ka na sedu tulu, pabia N na kontaba kil ki bardadi, ma N na disa, pa ka ningin kuda di mi mas di ki kil ki na oja na mi, o ki na obi na ña boka.

<sup>7</sup>Pa ka N pudi inci di garandesa pabia di kusa garandi ku Deus mostran, N dadu un kusa ku N pudi fala “fidida na ña kurpu”, ku Satanas ta manda pa bofotian, pa ka N pudi yalsa kabesa dimas. <sup>8</sup>Tris bias N ora Siñor aserka del, pa i tiran el, <sup>9</sup>ma i falan kuma si grasa justan, pabia si puder i ta mas sta kompletu si N sta fraku. Asin, N ta kontenti pa njata na ña frakesa, pa puder di Kristu pudi sta riba di mi. <sup>10</sup>N ta sinti alegria na ña frakesa, na njuria, na falta, na pirsigison, na kasabi, tudu pa amor di Kristu. Ora ku N sta fraku, la ku N ta sedu mas forti.

### Kudadi di Paulu pa koríntius

<sup>11</sup>N fasi suma tulu manera ku N ngaba ña kabesa, ma abos ku obligan pa N fasi asin. Abos ku dibi di ngabanba. Nin ku N ka sedu nada, ma N ka sta mas bas di ki ki bo garandi apostolus! <sup>12</sup>Ki manga di sinal ku milagri ku maravilya ku N fasi bo dianti, ku garandi pasensa, e ta proba kuma N sedu apostolu. <sup>13</sup>Na kal manera ku bo tratadu mas pior di ki utru igrežas? I pabia N ka kume na bo kusta? Garandi mal ku N fasi! Bo purdan!

<sup>14</sup>Ali N sta pruntu pa bai visita bos terseru bias. N ka na kume

**11.27:** Kap 6.5; At 20.17-21,31; 1 Kor 4.11

**11.29:** 1 Kor 9.22 **11.30:** Kap 12.5,9-10

**11.31:** Rom 9.1,5 **11.32:** At 9.24-25 **12.4:** Luk 23.43

**12.5:** Kap 11.30 **12.6:** Kap 10.8 **12.7:** Şef 2.3; Ez 28.24

**12.8:** Lei 3.23-27; Mat 26.39-44 **12.9:** Is 40.29; 41.10

**12.10:** Kap 7.4; 13.4; Rom 5.3 **12.11:** Kap 11.5

**12.12:** Rom 15.18-19; 1 Kor 9.2 **12.13:** Kap 11.7,9

**12.14:** Kap 13.1

na bo kusta, pabia N ka na buska kil ki di bos, ma bos propi. I ka fi-ju ku ta junta kusas pa papes, ma i papes ku ta junta pa fijus. <sup>15</sup>N ta kontenti pa gasta tudu ku N tene, te ña kurpu, pa juda bos. N na ama bos kada bias mas; N dibi di sedu menus amadu tambi?

<sup>16</sup>Bo na seta kuma N ka pisadu pa bos, ma algin na fala kuma N seduba jiru; N paña bos ku nganu. <sup>17</sup>Nta N splora bos ku kualker di kilis ku N manda bos? <sup>18</sup>N roga Titu pa i visita bos; N manda ki utru ermon ku el. Nta Titu splora bos? No ka na yanda na mesmu spiritu? No ka na fasi di mesmu manera?

### Ultimu avisu ku manteña

<sup>19</sup>Talves tudu e tempu bo kuda kuma no misti difindi dianti di bos, ma no na fala dianti di Deus, suma algin di Kristu. Tudu ku no na fasi i pa juda kumpu bos. <sup>20</sup>N ten medu pa, ora ku N ciga, N ka bai oja bos suma ku N misti; pa ka abos tambi bo ojan na manera ku bo ka misti; pa ka i ten jus na bo metadi, ku nveña, raiba, junda-junda, rui, sibi di vida di utru jinti, garandesa ku jumbulumani. <sup>21</sup>N ten medu pa, ora ku N bai, ña Deus i na rebañan bo dianti, tok N ta cora riba di kilis

ku tarda peka, e ka ripindi di se susidadi, ku mau vida, ku pekadu seksual ke fasi.

**13** <sup>1</sup>Es gora i terseru bias ku N na bai nunde bos. N na konta bos kuma, kualker akusason i ten ku sedu probadu pa boka di dus o tris tustumuña, suma ku palabra di Deus fala. <sup>2</sup>Sugundu bias ku N bai, N avisa bos un kusa oca N staba la. Gosi ku N ka sta la, N na torna avisa kilis ku tarda peka, ku tudu utru jinti, kuma si N torna bai, N ka na diskulpa elis. <sup>3</sup>Bo na ten tudu proba ku bo misti kuma Kristu ta fala na ña boka. El i ka fraku pa bos, ma i ta mostra si puder na bo metadi. <sup>4</sup>Bardadi, i muri na krus na frakesa, ma gosi i na vivi na puder di Deus. Anos ku ten parti na si frakesa, no na vivi ku el na puder di Deus pa sirbi bos.

<sup>5</sup>Bo jubi bo kabesa, bo julga si bo na vivi na fe inda. O bo ka sibi kuma Jesus Kristu sta na bos? O son si bo raproba ja. <sup>6</sup>Ma N spera kuma bo na bin sibi kuma anos no ka raproba. <sup>7</sup>No na ora Deus pa ka bo fasi nin un mal. I ka pa no parsi kuma no ka raproba, ma i pa bos bo fasi ben, nin ku no parsi suma no raproba. <sup>8</sup>No ka pudi fasi nada kontra bardadi, ma no pudi fasi son na fabur di bardadi. <sup>9</sup>No ta kontenti si no sta fraku, abos bo sta forti. El ku no ta pidi Deus, pa i kabanta fasi bos krentis maduru. <sup>10</sup>E ku manda N skirbi e kusas suma ku N ka sta la, pa, ora ku N bai, pa ka i pirsis pa N trata bos ku duresa, konformi otridadi ku Siñor

**12.15:** Kap 6.12; Fil 2.17; 1 Tes 2.8 **12.17:** Kap 7.2

**12.18:** Kap 8.16-18 **12.20:** Kap 10.2; 1 Kor 4.21

**12.21:** Kap 2.1 **12.21:** 1 Kor 5.1 **13.1:** Kap 12.14

**13.1:** Num 35.30 **13.2:** Kap 10.2; 12.21

**13.3:** Mat 10.20 **13.3:** 1 Kor 5.4 **13.4:** Fil 2.7-8;

1 Ped 3.18 **13.4:** Rom 6.4 **13.5:** 1 Kor 11.28

**13.5:** Jon 17.23; Rom 8.10; Gal 4.19 **13.5:** 1 Kor 9.27

**13.9:** 1 Kor 4.10; 1 Tes 3.10

**13.10:** Kap 12.19; 1 Kor 4.21

dan. I dan el pa N kumpu; i ka pa dana.

<sup>11</sup>Mbon ermons, N na dispidi bos. Bo kontenti, bo sedu pirfitu, bo seta ña pididu, bo konkorda ku ñutru, bo vivi na pas. Deus di amor ku ta da pas i ta sta ku bos. <sup>12</sup>Bo

fala ñutru manteña ku bežu santu. Tudu pobu di Deus manda bos manteña <sup>a</sup>.

<sup>13</sup>Fabur di Siñor Jesus Kristu, ku amor di Deus, ku kumuñon di Spiritu Santu, ta sta ku bos tudu. Amen.

---

**13.11:** Rom 12.16-18; 15.33    **13.12:** Rom 16.16

<sup>a</sup> **13.12** Tudu pobu di Deus manda bos manteña Utru tradusons pui es suma versikulu 13, logu e tene 14 versikulus    **13.13:** Rom 16.20